



Vischnaunca Tujetsch
Gemeinde Tujetsch

Protocol dalla radunonza da vischnaunca

dils 16 da mars 2018

allas 20.00 uras ella halla plurivalenta Dulezi a Sedrun

Protocol dalla radunanza da vischnaunca dils 16 da mars 2018 allas 20.00 uras entochen allas 21.55 uras, ella halla plurivalenta Dulezi a Sedrun

Presidi: Beat Roeschlin (president communal)

Actuar: Simon Collenberg

Dumbravuschs: Guido Friberg ed Ignazi Monn

Presents: 180 personas (inclus suprastonza ed actuar)

Tractandas

1. Avertura
2. Approbaziun dil protocol dils 8 da december 2017
3. Pendiculara Salins – Cuolm da Vi
4. Lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricitad – approbaziun
5. Orientaziuns
6. Varia

1. Tractanda Avertura / Beinvegni

Il president communal Beat Roeschlin fa in cordial beinvegni a tuttas Tuatschinas ed a tuts Tuatschins, als commembers dil cussegl da vischnaunca ed als commembers dalla cumissiun da gestiun tier la secunda radunonza da vischnaunca dil trienni 2017/2020.

Il president communal constatescha che la radunonza ei vegnida convocada tenor las prescripziuns dalla costituziun communal, artechel 30, cun la publicaziun ellas Tuatschinas nr. 4 dils 23 da fevrer 2018 e nr. 5 dils 9 da mars 2018 sco era sin la pagina d'internet dalla vischnaunca. Ultra da quei seigi vegniu reparti in messadi en mintga casada.

Ei dat neginas propostas da cumpletar ni midar la gliesta da tractandas, aschia che quella vegn declarada sco approvada. Ils posts sco dumbravuschs sorprendan Guido Friberg ed Ignazi Monn.

Las votaziuns vegnan per ordinari fatgas cun maunpli. Tier las votaziuns cun maunpli ei la pluralidad da quels che voteschan decisiva, ein las vuschs ulivas ei la damonda renviada. Ina quarta dils votants presents san pretender scrutini.

2. Tractanda Approbaziun dil protocol dils 8 da december 2017

Il protocol ei staus publicaus ella Tuatschina nr. 26 dils 29 da december 2017. Per quei motiv vegn ei desistiu da preleger il protocol.

Votaziun:

Il protocol dalla radunonza da vischnaunca dils 8 da december 2017 vegn approbaus unanimamein.

3. Tractanda Pendiculara Salins-Cuolm da Vi

Introducziun entras il president communal Beat Roeschlin:

Avon rodund in onn ha la vischnaunca Tujetsch menau atras ensemen cun representants dallas Pendicularas Mustér SA e la Pro Cungiari in workshop culla interpresa erlebnisplan ch'ei specialisada sil svilup da purschidas turisticas. Matthias Imdorf, directur dall'interpresa, ha silsunter eruiu ils resultats dil workshop. Tier la pendiculara Salins-Cuolm da Vi setracta ei d'in bien project cun in enorm potenzial turistic. Quei ei la conclusiun principala ord il workshop. Quei project savein nus era cumparegliar culla colligiaziun dils territoris da skis Samnaun ed Ischgl.

La pendiculara ei ord vesta turistica ina nova purschida, ina che nus savein era porscher durent la stad a nos hosps ed aschia procurar per in turissem sur gl'entir onn ora. Tier ils hosps dalla pendiculara s'audan pia viandonts, bikers sco era skiunzs. La pendiculara meina ils hosps en in territori aultalpin, quei ch'ei fetg dumandau ed attractiv ozildi. La pendiculara possibilitescha da crear ensemen cun tala pliras purschidas turisticas sco per exempel la cumbinaziun d'in viadi sil Cuolm da Vi cun ina buna tscheina ell'ustria. La pendiculara vesel jeu oravontut sco in proxim pass tier la destinaziun Sedrun-Mustér-Andermatt.

Ord vesta dall'economia duei la pendiculara trer novs hosps a Sedrun ed augmentar la valurisasiun en tuts secturs sco era las pernottaziuns. Certs hosps ein silla tscherca da loghens ruasseivels. Quei anflan els en nos cuolms. Cheu setracta ei denter auter da hosps svizzers sco era dall'Asia. La pendiculara duei cunzun trer da quels hosps, quei era ord il motiv damai che tals passentan entgins dis a Sedrun. Culla colligiaziun dils territoris da skis da Mustér e Sedrun-Andermatt ruchegia Sedrun el center dil svilup turistic. Quella circumstanza duess era svegliar igl interess tier novs investurs. Tenor miu meini ei il turissem la suletta sparta che muossa in cert potenzial da carschientscha e nua ch'igl ei pusseivel da crear plazzas da lavur. Ord quei motiv sperel jeu fetg cul consentiment dil pievel pigl emprest ed ils dretgs da servitud en favur dalla pendiculara Salins-Cuolm da Vi.

La fatschenta politica dad oz cumpeglia la concessiun d'in emprest ella summa da frs. 2.5 milliuns sco era da differents dretgs da servitud per las Pendicularas Mustér SA. Igl emprest vegn segiraus giu cun ina garanzia dalla Catrina Holding SA. Ils dretgs da servitud vegnan mo concedi sut la cundiziun che las Pendicularas Mustér SA suttascrivan la cunvegna supplementara. Las Pendicularas Mustér SA ein tenor il contract obligadas d'investar igl entir emprest ella construcziun dalla pendiculara e buca per in auter intent. Entochen ch'igl emprest ei buca pagaus anavos dallas Pendicularas Mustér SA, astga la societad acziunara buca pagar ora dividendas. Tier la garanzia setracta ei ord vesta dalla vischnaunca Tujetsch d'ina buna segirtad.

Igl emprest da frs. 2.5 milliuns vegn indicaus ella bilanza sut la facultad finanziaria. Cheutras vegn la dignitad da credit dalla vischnaunca buca reducida. Igl emprest vegn surdaus allas Pendicularas Mustér SA per in spazi da 20 onns. Tier l'entschatta da construcziun obtegnan las Pendicularas Mustér SA ina summa da frs. 1.75 milliuns. La summa restonta da frs. 0.75 milliuns vegn visada vi allas pendicularas da Mustér, cura che la pendiculara vegn prida en funcziun. Il tscheins pigl emprest s'orientescha suenter il tscheins hipotecar digl Uffeci federal da habitaziuns. Cheutras va la vischnaunca en negina resca quei che pertucca la fixaziun dil tscheins. Las pendicularas da Mustér ein obligadas da pagar anavos igl emprest enteifer ils proxims 20 onns, annualmein munta la summa da restituziun a frs. 125'000.00.

La garanzia che vegn prestada dalla Catrina Holding SA munta a frs. 2.5 milliuns. Quella resta tuttina sur gl'entir spazi digl emprest che munta a 20 onns. La vischnaunca Tujetsch sa far valeivel la summa aviarta enviers la Catrina Holding SA, priu il cass che las Pendicularas Mustér SA ein en retard culs pagaments e l'interpresa ei vegnida admonida senza success ni el cass che tala ei insolventa. La garanzia ei valeivla entochen ch'igl entir emprest ei pagaus anavos. Priu il cass che las pendicularas da Mustér pagan anavos igl emprest avon ch'ils 20 onns ein curri giu, croda la garanzia.

Per la construcziun ed il menaschi dalla pendiculara Salins-Cuolm da Vi, dil runal, dallas differentas staziuns e l'ustria ein las Pendicularas Mustér SA avisadas sin differents dretgs dalla vischnaunca Tujetsch. La vischnaunca Tujetsch ha l'intenziun da conceder ils suandonts dretgs allas Pendicularas Mustér SA. Per la concessiun dils dretgs indemniseschan las Pendicularas Mustér SA la vischnaunca Tujetsch tenor las indicaziuns cheusut.

Dretgs da traversar e per la construcziun dils cundrezs

La vischnaunca da Tujetsch ha l'intenziun da surdar ils suandonts dretgs da traversar e construcziun allas Pendicularas Mustér SA.

Contract da servitud: Runal Cuolm da Vi-Parlets (parcella nr. 3021):

- **dretg da traversar:** Pil runal Cuolm da Vi – Parlets vegn in dretg da traversar concedius.
- **dretg da construcziun:** Pil runal (petga nr. 1 entochen nr. 7) e la staziun da partenza vegn in dretg da construcziun concedius.
- **spazi:** 50 onns entochen ils 31 da december 2068.
- **tscheins annual:** frs. 940.00
- **tscheins total:** frs. 47'000.00

Contract da servitud: Pendiculara Sedrun-Cuolm da Vi (parcellas nr. 3021, nr. 3032 e nr. 2590):

- **dretg da traversar:** Per la pendiculara Sedrun-Cuolm da Vi vegn in dretg da traversar concedius.
- **dretg da construcziun:** Per la construcziun dalla petga nr. 3 e nr. 4 vegn in dretg da construcziun concedius.
- **dretg d'utilisaziun:** La parcella nr. 2590 (datier dalla staziun a Salins) vegn duvrada per differentas installaziuns el connex culla pendiculara Salins – Cuolm da Vi.
- **spazi:** 50 onns entochen ils 31 da december 2068.
- **tscheins annual:** frs. 4'260.00
- **tscheins total:** frs. 213'000.00

Dretgs da baghegiar

La vischnaunca da Tujetsch ha l'intenziun da surdar ils suandonts dretgs da baghegiar allas Pendicularas Mustér SA.

Contract dil dretg da baghegiar: parcella nr. 3021:

- **surfatscha:** 7000 m²
- **intent:** Silla surfatscha vegnan la staziun dalla cabina a Cuolm da Vi e l'ustria construidas.
- **spazi:** 50 onns entochen ils 31 da december 2068.
- **tscheins annual:** frs. 7'000.00
- **tscheins total:** frs. 350'000.00

Contract dil dretg da baghegiar: parcella nr. 3021:

- **surfatscha:** 500 m²
- **intent:** Silla surfatscha vegnan la staziun dil runal e la tegia da survegionza pil runal Cuolm da Vi – Parlets construidas.
- **spazi:** 50 onns entochen ils 31 da december 2068.
- **tscheins annual:** frs. 300.00
- **tscheins total:** frs. 15'000.00

Totalmein muntan las entradas dalla vischnaunca Tujetsch per la concessiun dils dretgs sur il spazi da 50 onns a frs. 625'000.00.

La suprastanza communal ha stipulau las suandontas cundiziuns el connex culla concessiun dils differents dretgs. Quellas cundiziuns ein descrettas en tuts contracts da servituds.

- La pendiculara va era durant la stad (fenadur entochen october).
- Las uras d'avertura per la stad ed igl unviern ein tuttina sco quellas dalla pendiculara Mustér-Caischavedra. Il temps d'avertura vegn fixaus sin fundament dils basegns e giavischs dils hosps.
- Tier la surdada dallas lavurs vegn il commerci indigen risguardaus tier prezis da concorrenza, aschilunsch ch'il prezi, la capaciad, la prestaziun e la qualidad constattan. L'infrastructura per la pendiculara e la montascha da tala ein exclusas da quella regulaziun.

Ina fetg impurtanta cumponenta dalla fatschenta ei era la cunvegna supplementara. Quella sto vegnir suttascretta dallas Pendicularas Mustér SA, schiglioc vegnan ils dretgs buca concedi. La cunvegna supplementara regla la construcziun dils parcadis pil surpli dil traffic che seresulta culla nova pendiculara, la contribuziun dallas Pendicularas Mustér SA vid l'infrastructura da basa per la colligiazion dils territoris da skis sco era las tariffas pils territoris da skis.

Jeu mond el cuort en sils impurtants puncts da quella cunvegna. La cunvegna scriva avon che las Pendicularas Mustér SA ein sin fundament dalla lescha da baghegiar communal sco era tenor il prinzipi dil caschunader obligadas da construir parcadis pil surpli dil traffic. Sco caschunader dil surpli dil traffic ein las Pendicularas Mustér avisadas sin parcadis e ston era suprender ils cuosts per la construcziun da tals. La lescha da baghegiar perscriva per ustrias sin 5 plazz da seser in parcadi. Per la calculaziun dils parcadis ch'ei necessari per la pendiculara vegn la capaciad da transportar tenor las directivas valeivlas risguardada. Las Pendicularas Mustér SA sincereschon cun la suttascripziun dalla cunvegna da construir parcadis, sche pusseivel datier dalla staziun a Salins, aschia ch'els hosps dalla pendiculara san contonscher tals a pei. Plinavon preveda la cunvegna che la vischnaunca sa ordinar las Pendicularas Mustér SA da baghegiar en in auter liug parcadis ed organisar naven da leu in survetsch da transport entochen a Salins el cass ch'igl ei buca pusseivel da construir parcadis datier dalla staziun da partenza a Salins. Las Pendicularas Mustér SA han da pagar ina taxa da cumpensaziun, sch'igl ei ord lur vesta objectivamein buca pusseivel da construir ils parcadis.

La Viefier Matterhorn Gotthard preveda da construir in surpassadi alla staziun da Sedrun. Quei surpassadi ei medemamein da grond avantatg per ils hosps che caminan tier la staziun dalla nova pendiculara a Salins. Ord quels motivs ha la suprastanza communal stipulau ella cunvegna che las Pendicularas Mustér SA ein obligadas da separticipar vid ils cuosts da construcziun dil surpassadi. La cumpart da participaziun vegn aunc definada pli tard. La Viefier Matterhorn Gotthard preveda medemamein da sanar ils proxims onns la punt sur il Bogn Sedrun e construir ina nova passarella pils pedunzs, semeglient sco tiel viaduct ella Val Bugnei. La passarella vegn nezegiada dils hosps che caminan tier la staziun dalla nova pendiculara a Salins. Ord quels motivs ha la suprastanza communal stipulau ella cunvegna che las Pendicularas Mustér SA ein obligadas da separticipar vid ils cuosts da sanaziun da quella punt. La cumpart da participaziun vegn aunc definada pli tard.

Ella cunvegna supplementara ha la suprastanza communal era stipulau pliras cundiziuns el connex cullas tariffas

Las Penderas Mustér SA concedan allas suandontas personas ina reducziun da 50% sil prezi ordinari digl abbonament annual da skis:

- Burgheis dalla vischnaunca Tujetsch.
- Personas cun domicil ella vischnaunca da Tujetsch.
- Affons ella vegliadetgna entochen 12 onns cun domicil a Tujetsch retscheivan gratuitamein dallas Penderas Mustér SA in abbonament annual.

Ei setracta cheu dallas medemas reducziuns sco tier l'Andermatt-Sedrun Sport SA.

Vinavon cuntegn la curvegna supplementara la pretensiun impurtonta dallas tariffas coordinadas. L'intenziun dallas tariffas coordinadas ei che l'Andermatt Sedrun Sport SA e las Penderas Mustér SA porschan in bigliet cun tal il hosp sa nezegiar domisdus territoris da skis (Sedrun-Andermatt e Mustér). Las tariffas coordinadas ston vegnir fixadas denter las duas penderas naven d'ina carta da dus dis.

Sco facit savein nus trer las suandontas conclusiuns:

- La pendera colligia Sedrun cun dus territoris da skis.
- La pendera ei ina ulteriura purschida pils hosps che promova nossa economia.
- La pendera tila hosps a Sedrun e generescha dapli pernottaziuns.

Tumaisch Valier, vischin da Camischolas:

La via da Valtgeva ei vegnida sanada igl onn 2011. La sanaziun ei vegnida menada atras sin fundament dalla procedura da perimenter. 70% dils cuosts han ils proprietaris dils baghetgs che profiteschan digl access entras la via Valtgeva surpriu. Sch'il project dalla pendera Salins-Cuolm da Vi vegn realisau, sto la procedura da perimenter vegnir revidida tenor la lescha da perimenter dil cantun Grischun, damai ch'igl access tier la staziun da partenza a Salins succeda sur quella via. Ina revisiun dalla procedura da perimenter sa vegnir pretendida enteifer 10 onns suenter la terminaziun da tala.

Priu il cass ch'ei vegn erregiu a Cungieri in parc d'eveniments, sto ina sortida per la glied impedida vegnir construida. Seresultan cheutras ulteriurs cuosts per la vischnaunca?

Tenor miu meini sto la pendera Salins-Cuolm da Vi vegnir integrada sco purschida ella carta da hosps e vegnir finanziada ord las taxas da hosps e turissem. Vegn quei ad esser il cass e tgei sto la vischnaunca Tujetsch contribuir per quella purschida?

Jeu hai il davos temps stuiu prender encunter dabia critica quei che pertucca miu agir politic. Jeu less exnum menziunar che la critica deriva buca dils commembers dalla suprastanza communal ni dil cussegl da vischnaunca, mobein da vischins e vischinas da Tujetsch. Quei ha dau da patertgar a mei. Jeu mettel bugen a disposiziun miu post sco president dalla cumissiun da gestiun sche mia persona ei buca pli giavischada.

Beat Roeschlin, president communal:

Tia objecziun concernent la procedura da perimenter prendel jeu bugen encunter. Quella vegnin nus ad examinar.

La vischnaunca Tujetsch vegn a far neginas investiziuns a Cungieri. La regiun da Cungieri ha in cert potenzial per purschidas turisticas. Quellas ston denton vegnir realisadas dad organisaziuns privatas e buca dalla vischnaunca Tujetsch. Priu il cass ch'ei setracta da bunas purschidas a Cungieri, vegn la suprastanza communal ad examinar sche talas san vegnir

finanziadas ord las taxas da hosps e turissem. Ord mia vesta s'auda denton la pendiculara Salins-Cuolm da Vi en mintga cass ella carta da hosps, damai ch'ei setracta cheu d'in product fetg attractiv.

Preziau Tumaisch, jeu apprezzeschel Tei sco profi per Tia lavur ella cumissiun da gestiun ed en favur dalla vischnaunca. Sch'jeu sai prender anavos la critica che Ti has retschiert, fetgel jeu naturalmein bugen quei. Tia lavur sco president dalla cumissiun da gestiun duei e sto esser critica. Jeu pretendel da Tei che Ti miras vinavon cun egls critics sillas fatschentas politicas. Quei ei numnadamein Tia incumbensa principala.

Marcel Schmid, vischin da Sedrun:

Il project sesanfla uss ella fasa finala. Nus savein decider oz sche nus vulein conceder igl emprest sco era ils differents dretgs. La realisaziun dil project dependa mo pli dil pievel da Tujetsch. Il cantun Grischun, la Confederaziun Svizra e la vischnaunca da Disentis/Mustér han gia concediu las contribuziuns directas ed ils emprests. Il maun public sustegn pia quei project. La Pro Cungieri ei vegnida reactivada igl onn 2016, cura che nus havein udiu ch'il project dalla pendiculara ei ella fasa finala. Nus havein susteniu quei project cun gronda propaganda sin ina ni l'otra moda. Nus vivin en nossa vischnaunca dil turissem. Sch'ei va bein cul turissem, dat ei lavur per tuts. Quella purschida vegn a dar buns impuls a nossa economia. Pil turissem ha la pendiculara in grond potenzial, quei duront la stad ed igl unviern. A Cungieri obtenin nus ina denterstaziun. Naven dalla staziun da Sedrun meina il surpassadi directamein ils hosps tier la staziun da partenza a Salins, aschia ch'era in optimal access pils hosps vegn construius. Jeu hai udiu d'in cusseglier a caschun dalla seduta dil cussegl da vischnaunca la suandonta construcziun: "Sche nus votein "na", fagein nus negin survetsch. Lein pia esser solidarics e votar cun in perschuadiu "gie"". Quella menziun sai jeu sustener cumpleinamein.

Giusep Lorenz Berther, vischin da Rueras:

All'entschatta erel jeu plitost sceptics enviars quei project. Uss hai jeu denton grond interess ch'il project vegni realisau. Jeu sedamondel denton sch'ina ustria a Cungieri sa esser profitabla. Sco nus savein ei il menaschi d'ina ustria plitost deficitaris. Plinavon eisi oz grev da recrutar il personal per ina ustria. E sche duas ustrias sin in tal territori san survivor, tschentel jeu fetg en damonda. Allora vai jeu aunc ina damonda. Tgi surpren ils cuosts per baghegiar ora la via da spassegiar sil tschancun naven da Parlets entochen a Cungieri?

Beat Roeschlin, president communal:

Jeu sun dil meini ch'igl ei buca pusseivel da menar ina ustria a Cungieri duront gl'entir onn ora. Normalmein van ils hosps culla pendiculara entochen sisum sil cuolm. Quei muossan era las cefras dalla pendiculara dil Sántis. Dus entochen treis pertschien dils hosps fan diever dalla denterstaziun sin quei territori. Paucs hosps sorteschan pia ella denterstaziun. Mo priu il cass ch'ina purschida fetg attractiva sesanfla a Cungieri sco per exempel in parc da divertiment ei la probabilitad pli gronda che pli biars hosps fan diever dalla extrada.

Quei che pertucca l'engrondaziun dalla senda da spassegiar naven da Parlets entochen a Cungieri dat ei differentas prescripziuns dalla vart dalla planisaziun dil territori che la vischnaunca sto risguardar. Plinavon eisi era da quintar cun protestas dallas organisaziuns digl ambient tier in tal project. Tgi che surpren ils cuosts per quei project, havein nus buca sclariu, damai che tal vegn pil mument buca persequitaus dalla suprastanza.

Andreas Cavegn, vischin da Rueras:

Il project plai a mi zun fetg. Il sulet punct negativ ei che la staziun da partenza dalla pendiculara sesanfla aschi lunsch naven dil vitg. Havess ei buca dau cheu ina outra sligiazion per la staziun da partenza?

Beat Roeschlin, president communal:

Sco vus saveis sesanflan las lingias d'electricitad dall'interpresa Swissgrid a Salins. Las lingias astgan buca vegnir sutpassadas sco era surpassadas dallas cabinas. Per posiziunar la staziun da partenza en in meglier liug, exista l'opziun da metter las lingias d'electricitad sut tiara. La dislocaziun dallas lingias sut tiara havess caschunau a Swissgrid gronds cuosts. Ord quei motiv ha quella interpresa buca dau il consentiment persuerter. Las Pendicularas Mustér SA han examinau tuttas pusseivladads per la staziun da partenza. La sligiazion presentada ei la megliera ch'ei resultada.

Votaziuns:

- a) **La radunonza da vischnaunca decida cun 176 vuschs encunter 1 vusch (3 abstenziuns) da conceder in emprést da frs. 2.5 milliuns pils proxims 20 onns allas Pendicularas Mustér SA per la construcziun dalla pendiculara Salins-Cuolm da Vi sut la cundiziun che la finanziaziun totala dil project ei garantida.**
- b) **La radunonza da vischnaunca decida cun 175 vuschs encunter 0 vuschs (2 abstenziuns) da conceder il dretg da traversar pil runal Cuolm da Vi – Parlets ed il dretg da construcziun pil runal (petga nr. 1 entochen nr. 7) e la staziun da partenza pils proxims 50 onns entochen ils 31 da december 2068 per in tscheins annual da frs. 940.00 sut la cundiziun che la cunvegna supplementara vegn suttascretta dallas Pendicularas Mustér SA.**
- c) **La radunonza da vischnaunca decida cun 174 vuschs encunter 0 vuschs (2 abstenziuns) da conceder il dretg da traversar per la pendiculara Sedrun-Cuolm da Vi, il dretg da construcziun per la construcziun dalla petga nr.3 e nr. 4 ed il dretg d'utilisaziun per la parcella nr. 2590 pils proxims 50 onns entochen ils 31 da december 2068 per in tscheins annual da frs. 4'260.00 sut la cundiziun che la cunvegna supplementara vegn suttascretta dallas Pendicularas Mustér SA.**
- d) **La radunonza da vischnaunca decida cun 177 vuschs encunter 0 vuschs (1 abstenziun) da conceder il dretg da baghegiar silla parcella nr. 3021 per ina surfatscha da 7000 m² pils proxims 50 onns entochen ils 31 da december 2068 per in tscheins annual da frs. 7'000.00 sut la cundiziun che la cunvegna supplementara vegn suttascretta dallas Pendicularas Mustér SA.**
- e) **La radunonza da vischnaunca decida cun 176 vuschs encunter 0 vuschs (1 abstenziun) da conceder il dretg da baghegiar silla parcella nr. 3021 per ina surfatscha da 500 m² pils proxims 50 onns entochen ils 31 da december 2068 per in tscheins annual da frs. 300.00 sut la cundiziun che la cunvegna supplementara vegn suttascretta dallas Pendicularas Mustér SA.**

4. Tractanda: Lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricitad – approvaziun

Introducziun entras il president communal Beat Roeschlin:

L'energia alpina drova il terren communal pil provediment d'electricitad. Dapi onns munta la taxa che l'energia alpina paga alla vischnaunca Tujetsch per far diever dil terren communal a 0.6 raps per kilowat ura. Tier las ulteriuras vischnauncas ella Surselva semova la taxa era sin quei nivel. L'energia alpina adossescha la taxa als consuments finals. Dapi igl onn 2008 manca denton ina basa legala. La nova lescha federala d'electricitad scriva avon che l'energia alpina sto sebasar sin ina lescha per ch'ella sappi adossar la taxa pil diever dil terren communal als consuments finals. Ensemen cull'energia alpina ha la vischnaunca elavurau ina tala lescha. Quella lescha duei vegnir integrada pli tard ella lescha per las contribuziuns d'avertura e las taxas da diever cura che tala vegn suttamessa ad ina revisiun.

Tractaziun dalla lescha:

Ei dat neginas midadas ed amplificaziuns vid la lescha

Votaziun:

La radunonza da vischnaunca decida unanimamein d'approbar la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricitad.

5. Tractanda Orientaziuns

Tgésa s. Vigeli:

Il project dalla Fundaziun Soldanella concernent la sanaziun dalla Tgésa s. Vigeli per siu intent pren plaunsiu fuorma. La direcziun dil project schai tier igl Uffeci social cantunal. La part veglia dalla Tgésa s. Vigeli duei vegnir spazzada e remplazzada cun in niev baghetg. La damonda dils pazients suenter loghens da vacanzas ha priu tier il davos temps. La Fundaziun Soldanella vul ord quei motiv era dar dimora a tals pazients egl avegnir. Igl ei da quintar cun in conclus dalla Regenza Grischuna concernent la finanziaziun dalla sanaziun dalla Tgésa s. Vigeli entras il cantun avon las vacanzas da stad. Las lavurs da construcziun entscheivan tenor il plan actual el decuors dil secund quartal 2019. La Fundaziun Soldanella ha stuiu ademplir pliras pretensiuns digl Uffeci social cantunal. Cheutier s'audan denter auter la successiun da signur Hanspeter Brun ch'ei vegnida reglada ed in contract da collaboraziun denter la Fundaziun Soldanella e la Casa Depuoz.

6. Tractanda Varia

Alfred Schmid, vischin da Sedrun:

Co vesa ei ora culla casa da scola a Rueras? Exista in project per l'utilisaziun da tala?

Beat Roeschlin, president communal:

La Fundaziun Soldanella ha priu a tscheins certas localitads dalla casa da scola a Rueras entochen igl onn 2021. Cheutras incassescha la vischnaunca entginas entradas d'affittaziun. La pegna en scola havein nus stuiu sanar dacuort. La vischnaunca era en contractivas cun ina fatschenta d'informatica che haveva interess dallas localitads. La firma ei denton seretratga, damai che la colligiaziun digl internet corrispunda buca a lur pretensiuns.

Uss hai jeu aunc ina informaziun. Quella fin d'jamna ha liug il campinadi da cuorsa liunga dils seniors (Masters) a Sedrun. Ei fagess plascher da s'entupar cun in ni l'auter da vus a quella occurrenza. La vischnaunca ha fatg diversas investiziuns ella loipa. Ord quei motiv eisi impurtont che la loipa vegn nezegiada, oravontut per da quellas caschuns.

Jeu siarel la secunda radunonza da vischnaunca dil trienni 2017/2020. Jeu engraziell per vossa atenziun, giavischel aunc ina biala sera ed in bien retuorn a casa.

Sedrun, ils 20 da mars 2018

Actuar:
Simon Collenberg

President communal:
Beat Roeschlin